

# **BAB 10**

## **KESIMPULAN MENDEPANI PEMIKIRAN KEAMANAN DAN KESEJAHTERAAN DI MALAYSIA**

*Ateerah Abdul Razak, Nur Azuki Yusuff dan Mohd Zain Mubarak*

### **PENDAHULUAN**

Dalam mendepani masa depan negara, masyarakat Malaysia dan masyarakat transnasional yang menetap dan berkerjaya dalam negara ini perlu memiliki pemikiran terbuka dengan prinsip keamanan dan kesejahteraan yang jelas. Justeru, bab akhir ini berusaha mengetengahkan cadangan prinsip yang perlu dimiliki dalam membentuk pemikiran keamanan dan seterusnya mengaplikasikan kaedah tersebut. Bab ini turut menghuraikan implikasi terhadap sebarang tindakan dan polisi yang diambil bagi sesebuah negara dalam membentuk masyarakat yang aman harmoni dan sejahtera. Begitu juga berkaitan kepentingan menjangka corak masa depan pemikiran yang lahir khususnya dalam kalangan masyarakat Malaysia.

### **KEAMANAN DAN KESEJAHTERAAN DARI PELBAGAI PERSPEKTIF**

Keamanan sejagat (universal peace) atau keamanan sarwajagat merujuk kepada situasi damai dalam konteks kemasyarakatan dan sosiopolitik. Keamanan sejagat bukan sekadar keselamatan hidup, bahkan kedamaian jiwa. Keamanan berasal daripada perkataan ‘aman’ yang bermaksud ‘bebas daripada keadaan kacau-bilau’, ‘bebas daripada gangguan atau sesuatu yang tidak menyenangkan,’ ‘damai’, ‘tenang’ dan ‘tenteram’. Ia juga diertikan dengan maksud ‘amanah’ dan ‘pesan’. Keamanan sejagat merangkumi seluruh alam zahir dan alam batin iaitu keamanan